



Aatsitassanut inatsimmiittup § 45c -p allannguutissaatut inatsimmik siunnersuummik kingusinnerpaamik UPA 2017 sioqqullugu saqqummeeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni aligoqqiit (diamant), aligut aappalaartut (rubin), safir, smaragd, chrysoberyl, kiisalu opal-it §§ 45-miit 45a-mut malittarisassat malillugit katersorneqarsinnaalersillugit.

(Inatsisartunut ilaasortaq Peter Olsen, Inuit Ataqatigiit)

Inuit Ataqatigiit ilisimavarpur nunaqavissut kinguaariaat ujaqqanik pinneraasiornermik pikkorillutik misilittagaqarluartut. Ukiunilumi kingullerni nunaqqaterpassuatta ujaqqanik pinneraasiassanik paaanermik silisinnermillu piginnaasaminnik inerisaanerit isumalluarfigalugu Inuit Ataqatigiinni malinnaaffigaarput.

Inuit Ataqatigiit isumaqarpugut naalakkersuinikkut ataatsimoorfigalugu siunnerfiussasoq, nunatsinni annikitsunik aatsitassarsiornernik ingerlatsinerit, soorlu ujaqqanik pinneraasiassanik paaanerit inuit maani najugallit inorsinnagit periarfissaassasoq.

Siunnersuuteqartoq isumaqatigaarput oqarmat ullumikkut ujaqqanik pinneraasiassanik paaasinnaanermut inatsit atuuttoq nunaqavissunut periarfissiinera amigaateqartoq. Inuit Ataqatigiinni isumaqarpugut nunatsinni innuttaaqatitta pikkoriffimminnik inerisaallutik nunatsinni kivitseqataajumanerat tigulluarlugu inatsisiliortutut pisussaaffigippat pitsaasunik inatsisitigut sinaakkusiuutissallugit.

Taamaammat Inuit Ataqatigiit sinnerlugit Inatsisartuni ilaasortap Peter Olsenip aaliangiiffissatut siunnersuutaa nunaqavissut ujaqqanik pinneraasiassanik paaasinnaanerannut pitsanngoriartitsisussaammat Inuit Ataqatigiinniit taperserparput. Nuannaarutigarpullu kiisami nunaqqatitta ujaqqanik pinneraasiassanik erlinnartunik suliaqarsinnaanerannut pitsaasumik aqutissiuusseqqileratta.